

քայն ընդ իւր ծառայսն ներքինիսն սպասաւորսն իւրում սենեկի. ասէ. Արժան է մեզ, այր որ գայ առ մեզ՝ զբաւսուցանել եւ ուրախ առնել որսովք եւ բազմականաւք, եւ ամենայն պեսպես վայելչութեամբք: 22 Այլ ոչ եթէ այնչափ ինչ արժան է զմեծ ինչ որսոյ տեղիս ի մերում երկրի աստ նմա տեսանել՝ վասն չարակնութեան յաչաղանաց չարաբարութեան նենգութեանն ազգին Պարսկաց. այլ նմանեցուցէք տեղիս դոյզնագիւտ որսոց ինչ՝ որով լոկ զբաւսուցուք զնա, եւ մի՛ որսասցուք զառատ ինչ որսոց գտեղիս, եւ զի մի՛ մեծ ինչ նախճիրս որսոց կոտորեալ առ ի ցոյցս առնելոյ: 23 Այլ վարկպարագի արասցուք, ասէ, վասն դառնացող չար ազգին չարութեանն դառնացող ազգին: 24 Այլ յերկրին Ապահունեաց, յոտինն մեծի լերինն Մասեաց, տեղին զայն որսասցուք. տեղոյն՝ որում անուն կոչի քաղաք Աղիորսք:

25 Ապա եկն եհաս Շապուհ Վարազն երիւք հազարաւքն, եւ յանդիման եղել թագաւորին յերկին Ապահունեաց. եւ մեծապես մեծարեցաւ ի նմանէ: 26 Եւ այն բանքն, որ վասն որսոյն ի թագաւորէն ասացաւ, վաղվաղակի յունկն զաւրավարին Պարսից հասանէին ի բերանոյ շորիկն շոգմոզն տիրանէնկն եւ տիրադրուժն տիրասպանուն տիրամատնիչն Փիսակայ, յայն յաշխարհակորոյս յառնէ անտի. եւ աւուրս սակաւս ուրախ լինէին ի միասին: 27 Այլ իշխանն Պարսից զթշնամութիւնն՝ զոր ունէր ի ներքոյ, խորամանգեալ ծածկեալ մեքենայեալ առագաստեալ բերէր, եւ առնէր սպաս զդաւն կատարել:

28 Եւ ի ժամանակին յայնմիկ այնպես դիպեցաւ, յայնմ ժամանակի զաւրավարքն չէին անդ, սարտուցեալ էին. եւ այլ մեծամեծք նախարարացն, եւ աւագ տանուտէրք ազատանին, սոյնպես եւ զաւրքն արթունի յիւրաբանչիւր տունս յիւրաբանչիւր կայեանս յիւրաբանչիւր դադարս դադարեալ էին: 29 Եւ ոչ ոք էր՝ որ մնացեալ էր առ թագաւորին, եւ ոչ գունդ եւ այրեւծի. բայց միայն սակաւ սպասաւորաւք հանդերձ, եւ որսոցն պառականաւք, եւ ռահվիրայ մարդկան, եւ խառնաղանջ խորանապահ զաւրուն, եւ ռամիկսպաս զաւրաւքն, եւ տիկնաւն հանդերձ եւ արթայորդին մանուկն Արշակ: 30 Այսպես սակաւութիւն դիպեալ ի ժամանակին յայնմիկ, զի թեպետ եւ տեսեալ հարուստ զնդաւ եկեալ զաւրավարն Պարսից, զի էին ընդ նմա սպառազէնք վառեալք արք իբրեւ երեք հազարք, ոչ ինչ խիթացեալ զգուշաւ անկասկած լինէր: 31 Զանզի տեսանէր զնա իբրեւ ի պատճառս խաղաղութեան եկեալ, մեծաւ պատարագաւք եւ պատուական ընծայիւք եւ մեծաշուք մեծարանաւք:

32 Եւ իբրեւ ոչ ինչ բազում աւուրք ընդ մեջ եղեն, յընթրիս կոչեն ի հաց հրաւիրեալ զարքայն. ի պատիւ մեծարանաց կոչէր: 33 Ապա իբրեւ ընդ գինիս մտին, քաջ արբեալ լինէին թագաւորն եւ որ ընդ նմայն էին, զաւրն դարանակալ յանպատրաստից յանկարծաւրէն յայլակարծուց զնոսա յանկարծուստ յիւրաբանչիւր բազմականի ի վերայ հասեալք ըմբռնէին, եւ վահանա-